



1 de setembro de 2010. A intención da Xunta de meterlle man ao Parque Natural de Corrubedo através da redacción dun novo PORN, que segundo o conselleiro Juárez ***“satisfaría a importante demanda veciñal relacionada con cuestións construtivas***
”

, vale dicir os intereses político-especulativos do PP, bate coa realidade dos feitos: un novo PORN para o LIC de Corrubedo

foi xa licitado

(DOG nº 234, 5/12/2006),

adxudicado

(DOG nº 102, 29/5/2007),

redactado

(28/12/2007), e ademais

sometido a avaliación ambiental estratéxica

(21/1/2008 –

[documento de inicio](#)

- e 11/6/2008 –

[documento de referencia](#)

-). Por que non aproban entón esta proposta? Que necesidade hai dun novo PORN? A resposta está... no cemento!

Este novo PORN listo dende 2008 e agora agochado, alén de adaptarse xa á nova lexislación europea, estatal e autonómica (outra das excusas do Sr. Juárez) establecía unhas condicións ambientalmente máis dignas para este emblemático espazo: unha **ampliación da superficie do LIC nun 79%** (máis de 16.500 ha) e a conexión co sector norte, no concello de Porto do Son, através dun corredor ecolóxico. Agora estas milloras, que aparecían incorporadas ademais na proposta de ampliación da Rede Natura 2000 elaborada polo bipartito en 2007, semellan non ser do agrado dos actuais xestores da biodiversidade galega.

Alén de retratarse como **perfectos ignorantes** da lexislación ambiental e urbanística (un PORN nunca pode someterse a un PXOM e facelo é prevaricar) e mesmo das súas propias

propostas (un eventual PORN “á medida do ladrillo” contradí frontalmente as determinacións das recentemente apresentadas DOT e do flamante POL), Juárez e García-Borregón son ademáis uns **pésimos xestores:** van tirar pola borda un traballo xa feito e que custou ao erario público **80.000 €**

.

Á marxe desta evidente falta de austeridade, Conservación da Natureza debería primeiro explicar por que non lle vale o novo PORN de Corrubedo elaborado pola USC, adxudicataria da redacción do documento, e rebater as iniciativas conservacionistas que propuña, consideradas por ADEGA no seu momento como axeitadas mais excesivamente cativas: xa dunha primeira redacción foron [eliminados 308.000 m²](#) para acoller a futura piscifactoría da Laxe Brava.

Ao compararmos a superficie afectada deste novo PORN redactado pola USC coa extensión actual do LIC, entendemos o por que da “UTE” (unión temporal especulativa) entre o Concello de Ribeira e a actual Xunta: as novas áreas terrestres propostas coincidían con terreos moi gorentosos para os **intereses urbanísticos e industriais**.

No mapa pódese comparar a extensión do actual LIC (morado) e a da fallida ampliación (verde). As frechas vermellas indican as zonas “conflitivas”:

Zona 1: intereses empresariais na zona da Penisqueira (macrodepuradora de Ribeira) e Couso-A Graña (polígono industrial)

Zona 2a: intereses urbanísticos en Carreira e Vixán.

Zona 2b: intereses urbanísticos en Corrubedo (Av. de Bos Aires, zona da Ladeira e Teira). Esta área propónse como corredor ecolóxico de unión entre os sectores N e S do LIC (complexo húmido de Corrubedo e costa de Porto do Son).

Zona 2c: intereses urbanísticos na zona de Espiñeirido.

Zona 3: piscifactoría da Laxe Brava (308.000 m² “caídos” xa da proposta orixinal).

Á vista destes datos, cabe preguntarse **a que intereses serven** os actuais xestores da biodiversidade galega. Se os Sres. Juárez e García-Borregón non son quen de entender que o seu deber é garantir a conservación do noso patrimonio natural aplicando as leis e non actuar como a **brigada de**

demolición

destes,

entón millor sería que

renunciaran ás súas competencias en conservación

. Teñan por seguro que dende ADEGA non imos asistir impasíbeis á violación das leis ambientais e á deconstrución dun dos espazos naturais emblemáticos do noso país: o complexo húmido de Corrubedo.